

[Straßburg], 4. Februar [1548]

An Johannes Oporinus

UB Basel, Fr. Gr. I 11, fol. 365r-v.
Fehlt bei Steinmann.

S. Non potui, Mi D. Oporine, citius ad te mittere literas, ob inopiam γραμματοφόρου, et ob rem incertam proprium mittere tabellarium, homini tenui graue est. Rogo autem, vt pro amicitia nostra et humanitate tua, causam meam diligenter agas. Malim habere aliquid certi, quod tolerabile mihi saltem esset, quam spe quantumuis bona differri diutius. Est insignis hospitis mei erga me benevolentia et liberalitas, sed ea est mea vel stulticia vel verecundia, vt aliena quadra viuere turpissimum ducam. Meis autem sumptibus vel Tubingae vel Basileae viuere malim, si sit necesse. De stipendio quod scribis, non queror. Est enim per se liberale, nisi magnitudine laborum et ministeriorum, sordidum reddatur. Vnius anni seruituti se addicere, magnum est, et tamen (vt opinor) non mihi tantum, sed et dominis commodius quam pacisci in eos annos, intra quos multa vtrinque accidere possunt. Illud polliceri de me potes, si et mihi puerorum ingenia ipsaque conditio, et dominis institutio moresque mei probabuntur: leuitatem meam non fore metuendam. Quòd si pater familias iniquitate fortunae fieri nequeo, iucundum mihi erit (quanquam alieniore aetate) Italiam videre. Quum vbique sim peregrinus, parum refert, quò peregre abeam. Experientia me docet, vbique παῦρα μὲν ἐσθλὰ, μεμιγένα πολλὰ, πλείονα λνγρά reperiiri. Interea meum officium esse puto, nihil praestare praeter culpam, caetera ferre moderate. Te autem, Mi Oporine, vehementer oro, des operam, ne quid temere vel amittamus vel admittamus. Quicquid autem fiet, καλοκαγαθίαν τε καὶ εὐγνωμοσύνην, vt spero, meam probabis. Vale. Pridie nonas Februarij. Epistolis Isocratis nudiustertius a me absolutis, bonum hunc virum onerare puduit. Praesertim quum non sit necesse. Dabo eas vel quum volueris vel vbi conuenerimus. Occupatus nunc sum in conferendo cum Domitij versione Pausania, in quo strenue, quoad licebit, pergam. Vereor tamen me ad aliquot hebdomadas impeditum iri, ob negocia quaedam sororum, quibus non facile negare potero. Et iam in Thermas, quas Ferinas vocant, ob valetudinem recreandam abiuissem, nisi responsum vestrum (quod quamprimum dari mihi velim) expectandum censerem. Iterum vale.

Hiero[nymus] T[uus].